

# DOMENIE XXII «VIE PAL AN»

## Jutoris pe Liturgjie

Domenie, ai 30 di Avost dal 2020

*Alore Gjesù ur vierzè la ment par lâ a font des Scrituris (Lc. 24, 45)*

### Vite - Bibie - Popul

pre Antoni Beline e une sô opinion di îr - par fânus rifleti vuê

### Furtunât il popul che il Signôr al è il so Diu

### *Ultimis riflessions di pre Antoni, autôr dal libri*

*(Continuant)... Prin di dut un invît a cognossi la Bibie. Chest al compuarte un stîl di vite e un stamp di spiritualitât che nol fâs part de nestre tradizion. La Bibie le vin simpri sintude a lei di chei altris, dai oms de religjon, e lôr, biâts, a àn let chei tocs che ur levin plui ben, cirint, magari in buine fede, di judânus plui a ubidî che a jessi protagoniscj; plui a sierâ i vôi che a vierziju. Pa la cuâl nol è di dâsi di maravee se la nestre int no viôt inte Bibie chê rivoluzion e chê novitât che invezit e je.*

*Cognossi la Bibie al vûl dî leile simpri, come ch'al faseve un gno bisbarbe cui Reali di Francia e cul Guerin Meschino, che ju à passâts e ripassâts fin che al à cedût il libri e lu à tradît i vôi, e come ch'a fasin i benedetins cu la regule di san Benedet, che le stan leint di mil e cincet agns e no le àn inmò no finide.*

*Une leture che nus compagne inte vite fintremai a l'ultime zornade, cuant che o passarin dal mont dai spiei e des parabolis al mont dal vêr e o viodarin Diu "muse a muse" (1 Cor 13, 12). Leile dibessôi e leile in compagnie, leile in glesie e leile in famee, par podê vê la furtune di chel arbul plantât ad ôr da l'aghe ch'al fevele il prin salm. Nus zovarà no dome par podê rivâ a la risultive de Vite, ma par vivi ben ancje in chest mont. (Al continue)*

\* \* \*

*A disin lis lengatis che te basiliche di S. Pieri a Rome sot de scrite in aur Tu es Petrus - Tu tu sês Pieri, a vareassin vût di meti, a onôr dal vêr, ancje lis peraulis dal Vanzeli di vuê li che Gjesù i dîs a Pieri: Vade post me, satane - Va lontan di me, satane! E al zonte: Tu mi sês di scandul, parcè che lis tôs ideis no son chês di Diu ma chês dai oms!*

*Nuie di speciâl se san Bernart di Clareval (1090 - 1153) al paragonave Rome a la Babonie de Apocalis e nol voleve che i siei dissepui a vessin di dâ dongje une abazie in chei paragjos che ju ritignive infets di ogni inicitât.*

*Al di là de reson o dal tuart, lis dos scritis nuie a cjolaressin a la lûs dal vanzeli e a saressin risultive di grande sapience e ecuilibri te conduzion de glesie.*

*Il scontro fra Gjesù e Pieri al è il speli dai doi incontraris: "paronâ - servî". Gjesù al va a Gjerusalem par "servî" il popul tal amôr, intant che Pieri al vûl che al vadi par conquistâ la glorie dai podês dal mont.*

*Ricuardin che inte tentazion dal podê, tal desert, Gjesù al ordene: Va vie di chi satane! (Mt 4, 8-11) e te costituzion de comunitât al spieghe: Chel che si fasarà piçul come chest frut, chel al sarà il plui grant tal ream dai cîi (Mt 18, 4).*

*Però, cence lâ a scomodâ la sante mari Glesie, il binomi "paronâ - servî" al è insedât in ognun di nô, gjeneticamentri. Di fat, tal mût dal inizi de storie umane, i ven dit a Cain: Se tu âs buinis intenzions, parcè no vastu cul cjâf alt? Ma se tu âs trist cûr, tu âs il pecjât su la parte, une bestie scrufuiade che ti breme ma che tu âs di rivâ a domâle (Gjen 4, 7).*

*Al scrîf S. Pauli: Cuant che o volarès fâ il ben, il mâl al è a puartade di man (Rm 7, 21).*

*Svicinînsi duncje al vanzeli di vuê cun timôr e rivuart (cf. Cor 7, 15); furtunâts nô, se si cjatassin sedi te fede e sedi te umiliazion di Pieri parcè che, si lei di une altre bande, - alore il Signôr voltantsi, al cjâlâ Pieri (cf. Lc 22, 61) - e dal sigûr, te sô bontât, al cjararès ancje sore di nô.*

### Antifone di jentrade

cf. Sal 85,3-5

**V**e dûl di me, Signôr,  
ch'o ai berlât viers di te dute la zornade:  
tu tu sês bon, Signôr, e tu perdonis,  
tu sês cjamât di boncûr cun ducj chei che ti clamin.

### Colete

Diu di ogni perfezion, ch'al è to dut ce che di miôr al è tal mont,  
semene tai nestrîs cûrs l'amôr pal to non,  
nudris in nô, cul cressi de fede, dutis lis robis buinis  
e, cul nestri impegn, vuarde ce che tu âs nudrît.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE

Gjer 20, 7-9

**La peraule dal Signôr e je diventade par me une vergogne.**

*La vite di Gjeremie (secul VII p.d.C.) e je la plui stralusinte anticipazion e icone dai patiments di Crist. Ancje par Gjeremie a valin lis peraulis ditis pal Signôr: Tai dîs de sô vite sun cheste tiere, lui al à ufrît preieris e suplichis cun grançj berlis e lacrimis a di chel che al podeve sfrancjâlu de muart e al è stât scoltât pe sô ubidience (cf. Eb 5, 7).*

*Scoltant chest toc di diari o tocjin cul dêt la passion dal profete e l'amôr a Diu e al popul che i brusave dentri. O podin talpinâ ta chestis landis di fede e di dolôr dome tun grant silenzi dal cûr e tun profont riepiet pe persone dal just perseguitât.*

### Dal libri dal profete Gjeremie

Tu mi âs imbroiât, Signôr, e jo mi soi lassât imbroiâ;  
tu mi âs sfuarçât e tu le âs vinçude.  
O soi diventât une sblefê seguitive,  
a son ducj che mi ridin daûr.  
Parcè che ogni volte ch'o feveli o ai di berlâ,  
o ai di professâ: «Violence e ruvine!».  
Propit! La peraule dal Signôr e je diventade par me  
une vergogne e une sblefê seguitive.  
Par chel o pensavi: «No vuei plui impensâmi di lui  
e no fevelarai plui tal so non!».  
Ma tal gno cûr al jere  
tant che un fûc ch'al bruse  
strucât intai miei vues;  
o cirivi di domâlu  
ma no ai rivât.  
Peraule di Diu.

### SALM RESPONSORIÂL

dal Salm 62

E à sêt di te, Signôr... *Ce fuesse cence font di marum tes invocazions di cheste persone tant provade! E nus baste la prime strofe: Diu... crichedi... pront... cirîti... arsetât... anime... cjar... brame... tiere sute... arsinide... cence aghe...*

*Ancje in chest moment milions e milions di lôr si cjatin in tragjics deserts, cence pistis e cence jutoris, tiere sute, arsinide, cence aghe. Cun lôr e fasintsi lôr vôs o podin dî:*

**R. E à sêt di te, Signôr, la mê anime.**

*Se cjantât, Il cjant dai salms responsoriâi p. 72.*  
Diu, Diu gno, sul crichedî o soi pront a cirfîti;  
e à arsetât di te la mê anime;  
viers di te la mê cjar e brame  
come une tiere sute, arsinide, cence aghe. **R.**

Cussî mi soi metût a cjalâti tal to santuari  
par viodi la tô potence e la tô glorie.  
Parcè che la tô gracie e vâl plui che no la vite,  
a cjantaran i miei lavris lis tôs laudis. **R.**

Cussî ti benedissarai par dute la vite,  
lis mans viers dal to non o slungjarai.  
La mê vite si passarà come te miôr taulade,  
biel che la mê bocje ti laudarà cjantant di ligrie. **R.**

Tu sês stât tu il gno jutori,  
jo mi jempli di gjonde sot des tôs alis.  
Tor di te si strenç la mê anime,  
la fuarce de tô gjestre mi sostente. **R.**

**SECONDE LETURE**

**Rm 12,1-2**

**Ufrî i vuestris cuarps come une vitime vive.**

*Di chestis sîs riis, al bastarès meditâ ancje dome lis primis dôs: Fradis, us racomandi... il vuestri cult spirituâl.*

*Al è il "cult" dal profete Gjeremie cuant che al incjarnave tal concret de sô vite la peraule di Diu; cult consegnât a la Samaritane: i vêrs adoradôrs a adoraran il Pari in Spirt e veretât (Zn 4, 24); cult che la preiere dal Pari nestri e comente in maniere maraveose.*

*Che o vebin la gracie di vivi ancje nô in chest "cult fat di vite"; vivilu prime dal cult dai rîts e des cerimoniis; prime dal rosari e di ogni devozion; imparant dai esemplis dai sants e dai profetis, dai piçui, dai puars di Jahvè, e soledut de vite di nestri Signôr.*

**De letare di san Pauli apuestul ai Romans**

Fradis, us racomandi pal boncûr di Diu di ufrî i vuestris cuarps come une vitime vive, sante, che i plâs a Diu, e chest al è il vuestri cult spirituâl. No stait a cjarâ sù il mût di compuartâsi di chest mont ma trasformaitsi di un continuo, rinovant simpri la vuestre cussience, in mût di rivâ a capî ben ce che Diu al vûl concretamentri di vualtris, ce ch'al è bon, ce che i plâs di plui, ce ch'al è perfet.  
Peraule di Diu.

**CJANT AL VANZELI**

**cf. Ef 1,17-18**

**R. Aleluia, aleluia.**

Il Pari dal nestri Signôr Gjesù Crist  
che nus dedi un spirt di sapience,  
par che o podin capî  
cuale ch'e je la sperance de nestre clamade.

R. Aleluia.

**VANZELI**

**Mt 16,21-27**

**Se un al vûl vignî daûr di me, ch'al rinei se stes.**

*Se la prime part di chest vanzeli - Gjesù al scomençà a fâur viodi - lis tôs ideis no son chês di Diu - a son la cronache di un fat, la seconde part Se un al vûl vignî daûr di me... - e à dibisugne de nestre riflission.*

*Se la prime part si riferîs a Pieri, la seconde nus tocje noaltris di persone; se la prime part si pues spiegâle a chei altris, la seconde, se o sin seris, nus tocje rumiâle dentri par sielzi, dopo, midiant di une cussience drete e sincere.*

### **Dal vanzeli seont Matieu**

In chê volte, Gjesù al scomençà a fâur viodi ai siei dissepui che lui al scugnive lâ a Gjerusalem e patî un grum par colpe dai anzians, dai soestants dai predis e dai scrituriscj; ch'al scugnive ancje jessi copât, ma che la tierce di al sarès resurît. Alore Pieri lu tirà in bande e al cirive di sconsêlu disint: «Diu ti vuardi, Signôr! Chest no ti sucedarà mai plui e mai altri». Ma lui, voltantsi cuintri di Pieri, i disè: «Va lontan di me, satane! Tu mi sês di scandal, parcè che lis tôs ideis no son chês di Diu ma chês dai oms!».

Alore Gjesù ur disè ai siei dissepui: «Se un al vûl vignî daûr di me, ch'al rinei se stes, ch'al cjapi su la sô crôs e ch'al vegni daûr di me. Parcè che chel ch'al vûl salvâ la sô vite le pierdarà; invezit chel che al pierdarà la sô vite par colpe mê le cjatarà. Di fat ce i zovaraial mo al om se, dopo di vê cjapât magari il mont intîr, al ruvine la sô vite? O ben, ce podaraial dâ l'om sore de sô vite? Di fat il Fi dal om al vignarà te glorie di so Pari compagnât dai siei agnui e in chê volte i darà a ognidun seont la sô condote». Peraule dal Signôr.

### **Su lis ufiertis**

Cheste sante ufierte nus siguri simpri, Signôr,  
la tô benedizion e la tô salvece  
e cu la sô fuarce e colmi ce ch'e opere intal misteri.  
Par Crist nestri Signôr.

### **Antifone a la comunion**

**Sal 30,20**

Cetant grant ch'al è, Signôr, il to boncûr!  
Tu lu teginis di bande par chei che ti temin.

### **O ben: Mt 5,9-10**

Furtunâts chei ch'a lavorin pe pâs, parcè che ur disaran fîs di Diu.  
Furtunâts chei ch'a son perseguitâts par colpe de justizie,  
parcè che il ream dai cîi al è lôr.

### **Daspò de comunion**

Nudrîts cul pan dal cîl, ti prein, Signôr,  
che chest sostentament dal to bonvolê al rinfuartissi i nestris cûrs  
e nus sburti a servîti intai nestris fradis.  
Par Crist nestri Signôr.

\* \* \*

**Sante messe e Eucaristie, rîts, preieris, cjants: Hosanna pp. 34 - 119.**

\* \* \*

**Lant sù viers Gjerusalem: par fâ di parons o par servî?  
Una nuova visione per la Chiesa**

*La chiesa è in crisi perché fa finta che seguire una costituzione medioevale con un sistema a due classi sia un buon modo di organizzare una organizzazione internazionale del XXI secolo con oltre un miliardo di membri. Semplicemente non funziona. E stiamo assistendo al fallimento di quel sistema.*

*(.....) Esiste un legame molto evidente fra un accumulo di potere e un abuso di potere.*

*Ovunque, in qualsiasi istituzione o nazione una mentalità che rifiuta di dividere equamente il potere fra uomini e donne, tra persone di varie razze culture e background spirituali, non solo è contraria alla nostra fede, ma è anche condannata ad essere impotente, insicura e regressiva, poiché si ritrova coinvolta in una costante battaglia contro il suo stesso popolo.*

*(.....) C'è una cosa sola che dobbiamo fare davvero con urgenza: smettere di stare al gioco, smettere di fingere, di ascoltare e obbedire, di supplicare e pregare...*

*(.....) Dobbiamo iniziare ad agire noi stessi... Vale a dire, iniziative che trasformino la chiesa in una comunità ricca e variegata, in cui tutti siano rispettati ed abbiano voce, in cui tutti siano trattati allo stesso modo indipendentemente dall'identità delle persone e dove chi è più vulnerabile sia anche oggetto di maggiore cura.*

*Questo è quello che spero.*

*A questo modo, alla fine, avremo dei leader, uomini e donne, che rappresentano il loro popolo e ne saranno responsabili, che non saranno padroni ma servitori della propria comunità e difensori dell'uguaglianza e della giustizia, credibili anche fuori della Chiesa, tanto necessari in questo momento storico.*

Doris Wagner

\* \* \*

- \* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- \* *Il cjant dai salms resposoriâi, Ed. Glesie Furlane, 2012.*
- \* *Il libri des riflessions di pre Antoni al è: pre Antoni Beline, Furtunât il popul che al è il Signôr il so Diu - par une leture sapienziâl de Bibie, Edizion "La Patrie dal Friûl", 1991.*
- \* *50 corâi de cristianitât todescje voltâts par furlan, ed. Glesie Furlane, 2016.*
- \* *Par domandâ chescj libris scrivêt a [info@glesiefurlane.org](mailto:info@glesiefurlane.org)*